

“El-yurt umidi” jamg'armasi stipendiya tanlovida ishtirok etuvchilar yosh toifasi:

bakalavriat bo'yicha
25 yoshgacha

magistratura
20-45 yoshgacha

doktorantura
22-45 yoshgacha

YOSHLAR OVOZI

**BIZ – KELAJAK
BUNYODKORIMIZ!**

Ijtimoiy-siyosiy, iqtisodiy,
adabiy-badiiy
gazeta

27 (16480)
2022-yil, 7-may
shanba

/yoshlarovozi

/yoshlarovozi

/yoshlarovozi.uz

Mahalladagi yoshlar yetakchisi
3-bet

Ishsizlarga ish,
muhtojlarga ko'mak

Kun mavzusi
4-bet

100 000 dollarlik
tanlov

Talabalar hayotidan
6-bet

Yo'qlama nega
kerak?



Foto: O'ZA

QAHRAMONLAR XONADONIDA

9-MAY – XOTIRA VA QADRLASH KUNI

batafsil
2-betda ↓

QAHRAMONLAR XONADONIDA



Yurtimiz tinchligi va ravnaqi yo'lida xizmat qilgan keksalarga alohida hurmat-e'tibor ko'rsatish, ajdodlar xotirasini yod etib, ezgu ishlarini davom ettirish xalqimizga xos azaliy qadriyatga aylangan. Ayniqsa, mehr-oqibat, muruvvat, himmat ko'rsatish an'analari Xotira va qadrlash kunida yanada yorqin namoyon bo'ladi.

Mana shu qadriyatlarni munosib davom ettirish, keksalarni ardoqlash, ko'makka muhojirlarning hurmatini joyiga qo'yish, o'txonalarni xotirlash, aziz otaxon-ona xonalarning duosini olmoqlik maqsadida **Yoshlar ishlari agentligi** hamda **Yoshlar ittifoqi** tomonidan "Sharaf lentasi" aksiyasi, uch avlod uchrashuvlari, "Inson aziz – xotira muqaddas" shiori ostida madaniy tadbirlar, davra suhbatlari, ochiq muloqot hamda ko'rgazmalar, ijodiy kechalar, "Vatanparvarlar" harbiy-sport musobaqasi, "Obodlik ko'ngildan boshlanadi!" shiori ostida obodonlashtirish tadbirlari, onlayn viktorinalar, II Jahon urushi qatnashchilari, Vatan himoyasida halok bo'lgan harbiy xizmatchilar oilalaridan xabar olish; ixtisoslashtirilgan maxsus ta'lim muassasalari, "Mehribonlik", "Saxovat" uylari, "Oilaviy bolalar uylari" va Bolalar shaharchalarida tahsil oluvchi yoshlar orasida xayriya tadbirlari, xeshteg aksiyalari kabi bir qator targ'ibot tadbirlari o'tkazilmoqda.

Prezident farmoniga muvofiq O'zbekistonda **236 nafar** Ikkinchi jahon urushi qatnashchilarining har biriga **15 000 000 so'm** miqdorida bir marta pul mukofoti, "Mustaqillik monumnti"ning statuetkasi, O'zbekiston Respublikasi Prezidentining tabrigi, shuningdek, vazirlik va idoralar, hokimliklar tomonidan ta'sis etilgan sovg'alar topshirilmoqda.

SHARAF LENTASI – FAXR IFODASI

Do'ppimiz o'zbekligimizning ifodasi bo'lganidek, "Sharaf lenta"miz ham shu yurt, shu aziz Vatanning baxtiyor fuqarolari ekanligimizning yorqin belgisidir. Mana shu faxr tuyg'usi, tinch va osuda hayotimizga shukronalik, Vatanga, ona-yurtga bo'lgan muhabbat hislarini uyg'otish maqsadida respublikamizning barcha hududlarida 9-may – Xotira va qadrlash kuni munosabati bilan "Sharaf lentasi" aksiyasi ko'tarinki ruhda o'tkazib kelinmoqda.

Aksiyalar doirasida hududlarning aholi gavjum joylarida 12 ming dona "Sharaf lentasi" yurtdoshlarimiz va xorijlik mehmonlarga taqdim etildi. Jumladan, Buxoro viloyatida joylashgan "Labi hovuz" ansambli maydonida, Farg'ona viloyati Ahmad al-Farg'oni nomi-dagi istirohat bog'ida, Shahrisabz shahridagi Oqsaroy majmuasida, Navoiy shahri markazida joylashgan "Yangi hayot" gipermarketi hovlisida va bir qator viloyat markazlarida tashkil etildi. Aksiya doirasida ko'ngilli (volontyor) yoshlar va sardorlar faol ishtirok etishdi.

Bibijan ARALBAYEVA,
Yoshlar ishlari agentligining
Intellektual o'yinlar va volontyorlikni
rivojlantirish bo'limi boshlig'i



OBODLIK KO'NGILDAN BOSHLANAR

Xonadonimizni, hovlimizni, ko'chalarimizni, arig'-u tomorqalarimizni saranjom tutish xalqimizga xos odat, har birimizning kundalik vazifamiz. Biroq uni keng ko'lamda bajarish ezgu amallar bardavomligini ta'minlaydi. Shu maqsadda 26-apreldan 10-maygacha o'tkazilish rejalashtirilgan obodonlashtirish tadbirlari jadal davom etmoqda.

Jizzax viloyati Zarbdor tumanida "Obodlik ko'ngildan boshlanar" shiori ostida umumxalq xayriya hashari mahalla hududida joylashgan "Toshkesgan ota" ziyoratgohida o'tkazildi. Forish tumani sardorlari esa Xotira xiyobonida obodonlashtirish ishlarini olib bordi. Obodonlashtirish tadbirlarida Buxoro, Samarqand, Navoiy, Sirdaryo viloyatlari, tumanlardagi Yoshlar ittifoqi sardorlari, yoshlar yetakchilari hamda mahallalardagi yoshlar faol ishtirok etishdi.

QAHRAMONLAR XONADONIDA

"Falsafaning bosh muammasi nima?" degan savol qariyb bashariyat yaratilganidan buyon kishilar bahs-u munozarasiga sabab bo'lib kelayotgani hech kimga sir emas. Bu munozarani qanday davom ettirish, bugun unga qay tarzda yechim topish – ilmning ishi.



Biroq sharqona, sodda, eng muhimi, xalqona falsafa shuki, inson ong-tafakkuri uchun asosiy muammo borliqning abadiyligi-yu kishi umrining o'tkinchiligi o'rtasidagi qarama-qarshilikda mujassam. Xotira – odamlarning vafotidan keyin ham bu dunyoda yashashi uchun imkon beradigan birdan-bir makon. Odamlar – ortda qolganlar xotirasida yashashga intilish ilinji kishini tarbiyalaydi. Uni

ezgulikka, kishilarning biror-bir koriga yarab qolishga, umri zoye ketkazmaslikka undaydi. Shunday kishilar tirikligida ham qadr topadi. Xalq hech qachon yaxshi farzandlarini esdan chiqarmaydi. Xalqning xotirasiz yashashi aslo mumkin emas.

Urushlarda qurbon bo'lgan millionlab yurtdoshlarimiz xotirasiga ta'zim qilish, bugun saflarimizda yurgan, osmonimiz musaffoligi, yurtimiz ravnaqi yo'lida xizmat qilgan nuroniylarga yuksak hurmat-ehtirom ko'rsatish esa bizning eng oliy burchimizdir.

9-may munosabati bilan Ikkinchi jahon urushi qatnashchisi Vera Nosirova xonadonida bo'lindi. 1925-yilda tug'ilgan Vera Nosirova ayni damda 96 yoshda. Hozirda Qarshi shahridagi "Qarliqxon" mahallasida yashab kelayotgan onaxon 1 nafar farzand, 3 nafar nabira hamda 20 dan ortiq chevaralar ardog'ida.

Bundan tashqari, Andijon viloyatidagi harbiy qismlarning birida shartnoma bo'yicha xizmat qilib, o'z xizmat vazifalarini a'lo darajada bajarayotgan vaqtida halok bo'lgan Navro'z Aliqulov xonadonida bo'lib, esdalik sovg'alari topshirildi.



"Xotira bor ekan, millat barhayot" shiori ostidagi aksiya yurtimizning barcha tuman va shaharlarida davom etmoqda.

9-may... Bu kunni eslang, chunki abadiylik undan boshlanadi.

ISHSIZLARGA ISH, MUHTOJLARGA KO'MAK

Iqbol PARDAYEVA,
"Yoshlar ovozi" muxbiri

Faoliyatiga nazar tashlamoqchi bo'lgan qahramonimiz surxondaryolik Shahzod Xudoyberdiyev. U viloyatning Sho'rchi tumanidagi "Navro'z" mahallasi yoshlar yetakchisi.



Zafar BOZOROV, talaba:

– Toshkent tibbiyot akademiyasi Termiz filialining 3-bosqich talabasiman. Shartnoma asosida o'qiyman. Oilaviy sharoitim og'irligi, yolg'iz onam o'zi kontraktimni to'lashga qiynalib qolgan payti mahallamizga yoshlar yetakchisi tayinlandi. Yoshlar yetakchisi mahalla yoshlarining

MAHALLA YETAKCHISI
XORIJGA ISHLASH UCHUN
KETGAN 34 NAFAR YOSH
TAQDIRIGA HAM ALOHIDA
E'TIBOR QARATMOQDA.

muammolarini hal qilib berayotganini eshitib, men ham murojaat qildim. Ular kontraktimning ma'lum qismini to'lab berishi mumkinligini aytdi. Oradan ko'p o'tmay kontraktimning yarmi to'lab berildi. Bizga shunchalik e'tibor berilayotganidan xursandmiz.

Mehnat faoliyatini juda erta boshlagan Shahzod 20 yoshida O'zbekistondagi eng yosh savdo-sanoat palatasi rahbari, 22 yoshida eng yosh mahalla fuqarolar yig'ini raisi, 23 yoshida Xalq deputatlari Surxondaryo viloyat kengashi deputati bo'lgan. Yoshlar yetakchiligiga o'tgunga qadar "Milliy tiklanish" demokratik partiyasi Sho'rchi tuman kengashi raisi sifatida faoliyat yuritgan. Shuningdek, Shahzod Oliy Majlis Qonunchilik palatasi huzuridagi Yoshlar parlamenti a'zosi hamdir.

Mahalla fuqarolar yig'ini raisi bo'lib ishlaganida uning tashabbusi bilan homiylar hisobidan mahallaning hozirgi binosi qurib bitkazilgan. "Kun kelib shu binoda yangi lavozimda faoliyat olib boraman, deb hech o'ylamagandim", – deydi qahramonimiz.

Shahzod o'ziga yuklatilgan vazifalarga mas'uliyat bilan yondashishga odatlangan. "Kasalni davolagandan uning oldini olgan afzal" degan naqlni hayotiy shioriga aylantirgan qahramonimiz mahallada jinoyat sodir etishga moyilligi bor yoshlarni e'tibordan chetda qoldirmaslikka harakat qiladi.

Mahallada istiqomat qilayotgan ana shunday yoshlardan biri Umidjon Turdaliyev ota-onasidan yetim qolib, opasining qaramog'ida ulg'aydi. Hech bir ishning boshini tutishga qiziqmagan, maqsadsiz erta-yu kech ko'chada yuradigan Umid mahalla yoshlar yetakchisining e'tiboridan chetda qolmadi. Avvaliga u ko'cha sardori etib tayinlandi. Shu paytga qadar oilaviy sharoiti og'irligi bois

hech bir hujjatga ega bo'lmagan Umidga fuqarolik pasporti olib berilib, muddatli harbiy xizmatga yuborildi. Barcha xarajatlar mahalladagi yoshlar yetakchisining tavsiyasiga binoan subsidiya asosida qoplab berildi.

Yoshlar yetakchisi mahalla yoshlarining bo'sh vaqtini mazmunli o'tkazishga ham alohida ahamiyat qaratmoqda. Shu bois mahallada muntazam sport musobaqalari va "Zakovat", "Mushoira", "Munozara" kabi intellektual o'yinlar tashkil etilib, g'olib jamoalar esdalik sovg'alari bilan taqdirlanib kelinmoqda.

– "Bir million dasturchi" va "1 nuroniy 10 nafar yosh" shiori ostidagi loyihalarga yoshlarning qiziqishi katta, – deydi Shahzod Xudoyberdiyev. – Mahallada oylik reja asosida loyihalar muntazam tashkil etiladi. Oylik reyting natijalarini shakllantirgan holda faol yoshlarni taqdirlab boramiz. Har haftada mahallada mavjud 13 ta ko'cha sardori bilan birgalikda ijtimoiy himoyaga muhtoj yoshlar holidan xabar olish yo'lga qo'yilgan.

Mahalla yetakchisi xorijga ishlash uchun ketgan 34 nafar yosh taqdiriga ham alohida e'tibor qaratmoqda. Vatanga qaytish istagini bildirgan 4 nafar yoshni ham ish bilan ta'minlash choralarini rejalashtirmoqda. Shu kunga qadar tikuvchilik qilish istagini bildirgan 2 nafar xotin-qizga subsidiya asosida tikuv mashinasi, 2 nafar yigitga payvandlash uskunasi olib berildi. Shuningdek, 2 nafar yoshga yetakchi tavsiyasi asosida safarbarlik chaqiruv rezervidagi xizmatni o'tashi uchun shartnoma to'lovi hamda 1 nafar talabaga to'lov shartnomasi pullarining yarmi qoplab berildi.



Kamola YAXSHIBOYEVA, tikuvchi:

– Yoshlar yetakchisi xatlov davomida uyimizga kelganida unga tikuvchilik hunarim borligini, biroq buning uchun tikuv mashinam yo'qligini aytdim. Ko'p vaqt o'tmay subsidiya asosida tikuv mashinasi olib berildi. Hozir qo'ni-qo'shnilarimiz uchun ko'ylaklar tikib, kuniga 50-60 ming so'm daromad topyapman. Oila a'zolarimiz ham bundan xursand. Mahalla yoshlar yetakchimizning menga bergan yordamiga javoban, mahalladagi bir nechta ishsiz, hunar o'rganish istagidagi yoshlarga tikuvchilik hunarini o'rgatmoqchiman.

Umida OMONOVA,

shaxmat bo'yicha o'smirlar o'rtasida jahon chempioni

IFTIXOR

G'ALABA HISSI

– Men ham o'z yosh toifamda 2 yo'nalishda ishtirok etdim. Rapid yo'nalishida 9 imkoniyatdan 7 tasida g'alaba qozondim. Blitz yo'nalishida esa 9 imkoniyatdan 8 tasida g'alabaga erishdim. Bu natijalar jahon chempioniga aylanishimga yetarli bo'ldi.

Musobaqa juda qiyin kechdi, tajribali va kuchli raqiblar jamlangan. Italiya, Polsha, Estoniya, Avstraliya davlatidan kelgan ishtirokchilar bilan bahs olib bordim.


Bizni kutib olish jarayonlari ham juda yaxshi tashkilashtirilgan. Yarim tun bo'lishiga qaramay, Yoshlar ishlari agentligi, faol yoshlar, jurnalistlar hamda mahalliy aholi kutib olish uchun chiqishdi.

Toshkent Xalqaro aeroportida Gretsiyaning Rodos orolida o'tkazilgan tezkor shaxmat bo'yicha o'smirlar o'rtasida jahon chempionati g'oliblari – Umida Omonova hamda Humoyun Bekmurodovni tantanalik kutib olish marosimi bo'lib o'tdi. Marosimda Yoshlar ishlari agentligi, Sportni rivojlantirish vazirligi va O'zbekiston Milliy olimpiya qo'mitasi rahbariyati hamda keng jamoatchilik vakillari ishtirok etdi.



Foto: Zohid MALIKOV

unicorns



100 000 DOLLARLIK TANLOV

Muhammadshukur
MUHAMMADJONOV

Yoshlar ishlari agentligi hamda Innovatsion rivojlanish vazirligi tomonidan Shanxay hamkorlik tashkilotiga a'zo kuzatuvchi va muloqot uchun hamkor mamlakatlar yoshlarining eng yaxshi startap loyihasi tanlovi – "Unicorns SCO" tashkil etilmoqda.

Tanlovning asosiy maqsadi – mamlakatlar hamda yoshlar tashkilotlari o'rtasidagi do'stlik va hamkorlik aloqalarini mustahkamlash, startap tanlovlariga keng auditoriyani jalb qilish, startap loyihalari faoliyatida faollikni oshirish va yoshlarni qiziqtirish, dunyoning eng yaxshi startaperlari mahoratini namoyish etish, yoshlar o'rtasida tajriba almashish, SHHTga a'zo mamlakatlar startap ekotizimini rivojlantirish.

SHHTga a'zo davlatlar Yoshlar kengashi doirasida o'tkaziladigan mazkur tanlov yoshlarning davlatlararo muloqotini mustahkamlash va faollashtirishga yordam beradi, tadbirkorlik qobiliyatining o'sishiga va shaxsning har tomonlama rivojlanishiga ko'maklashadi.

Tanlovda tegishli yoshlar tashkilotlari rahbarlarining qarori bilan tashkilotga a'zo davlatlar, kuzatuvchilar va muloqot uchun hamkor mamlakatlardan 18 yoshdan 35 yoshgacha bo'lgan yoshlar ishtirok etishi mumkin. Loyiha-ning mukofot jamg'armasi 100 000 AQSh dollarini tashkil qiladi. Tanlov so'nggida 10 ta eng yaxshilar aniqlanadi va har bir g'olibga 10 000 AQSh dollaridan pul mukofoti topshiriladi.

"Unicorns SCO" tanlovida ishtirok etish uchun IT-ishlanmalar, kitobxonlikni ommalashtirish, turizm, arxitektura va uy-joy kommunal xo'jaligi, qishloq xo'jaligi va oziq-ovqat sanoati, tejamkor energiya, davlat xizmatlari va biznes jarayonlarini avtomatlashtirish, moliyaviy xizmatlar, tibbiyot, transport va logistika xizmati, tadbirkorlik va xizmat ko'rsatish, ekologiya, sport, reklama, media kabi yo'nalishlarda innovatsion texnologiyalarni yaratishga qaratilgan loyihalar taqdim etish lozim.

Tanlov 2022-yil aprel oyidan 2022-yil iyun oygacha davom etadi. Arizalar tanlovning birinchi bosqichida – 15 kun muddatda qabul qilinadi.



177

IMKONIYAT

YOSHLAR
UCHUNIMTIYOZLI
MIKROKREDITLAR

Prezidentimizning 2020-yil 13-oktabrdagi "Aholini tadbirkorlikka jalb qilish tizimini takomillashtirish va tadbirkorlikni rivojlantirishga doir qo'shimcha chora-tadbirlari to'g'risida"gi qaroriga ko'ra, nodavlat ta'lim tashkilotlari maxsus sertifikatini olgan tadbirkorlik tashabbusiga ega jismoniy shaxslar, shu jumladan, yoshlar va xotin-qizlar mikrofirmaga va kichik korxonaga ta'sis etgan shaxslarga:

- o'z biznesini tashkil etish uchun 33 million so'mgacha bo'lgan miqdordagi mikro kreditlar ta'minotsiz ajratiladi;
- uchinchi shaxs kafilligi, sug'urta polislari, kredit hisobiga sotib olinayotgan mol-mulk- lar garovi, Tadbirkorlik faoliyatini qo'llab-quvvatlash davlat jamg'armasining kafilligi va qonun hujjatlarida nazarda tutilgan boshqa ta'minot turlari asosida 225 million so'mgacha miqdorda mikro kreditlar ajratiladi.

Imtiyozni taqdim etish tartibi va mud-datlari:

- imtiyozni toifalarga mansub shaxslar imtiyozdan foydalanish yuzasidan tegishli hududlarda faoliyat yurituvchi tijorat banklari ("Mikrokreditbank" ATB va AT "Xalq banki") tuman va shahar filiallariga murojaat qilishlari mumkin;
- murojaatga talabgor nodavlat ta'lim tashkilotlari maxsus sertifikat yoki mikrofirmaga va kichik korxonaga ta'sis hujjatlarini ilova qilishi lozim;
- imtiyozni qo'llash bo'yicha murojaatlar O'zbekiston Respublikasining "Jismoniy va yuridik shaxslarning murojaatlari to'g'risida"gi qonunida belgilangan muddatlarda ko'rib chiqiladi.

MIYA FAOLİYATI VA XOTIRANI YAXSHILAYDI

Lobar QODIROVA



"Besh tashabbus olimpiadasi" yoshlarning san'at va sport, kitobxonlik va kompyuter texnologiyalariga qiziqishlarini oshirish, qobiliyatlarini rag'batlantirishda davom etadi.


Hududlarda olimpiadaning barcha yo'nalishlari bo'yicha mahalla bosqichlari tugab, kuchlilar keyingi bosqichga o'tkazildi. Endi navbat – sektor bosqichiga! Voleybol, shashka va yengil atletika bo'yicha viloyatlarda 5-maydan 8-maygacha sektor bosqichlari bo'lib o'tishi rejalashtirilgan.

Shashka miya faoliyatini, xotirani yaxshilashga yordam beradi. Fikrlash qobiliyatini ham rivojlantiradi. Voleybol bilan shug'ullanish esa yoshlarni jismonan sog'lom va baquvvat qiladi. Buni **Andijon shahrida** shashka musobaqasining sektor bosqichida qatnashayotgan yoshlar ham aytishmoqda. Musobaqaning 16–21 yosh, 22–26, 27–30 yosh toifalarida jami 60 nafar yoshlar ishtirok etdi.



Voleybol musobaqalarida esa jami 162 nafar yoshlar ishtirok etdi. Musobaqalarda mahalla jamoalari viloyat bosqichiga chiqish uchun bor imkoniyatlarini ishga soldi. Yakunda o'g'il bolalar o'rtasida "Sanoat" mahallasi jamoasiga omad kulib boqdi. Qizlar o'rtasidagi o'yinlarda esa "Qoratut" mahallasi jamoasi keyingi bosqichga yo'llanma oldi.

Bunday musobaqalar Farg'ona viloyatida ham davom etmoqda. Xususan, **Marg'ilon shahrida** shashka, voleybol va yengil atletika sport turlari bo'yicha musobaqalar erkaklar va ayollar o'rtasida o'tkazildi. Musobaqalar qiziqarli uchrashuvlarga boy bo'ldi. Har bir jamoa g'oliblik uchun shijoat bilan harakat qildi. So'nggi xulosalarga ko'ra, "Yo'rmadoz", "Ho'ja-Parso", "Saxovat", "Uzunxovuz", "Sholdirama", "Vatan" mahallasi yoshlari g'olib bo'ldi.



BOZOR IQTISODIYOTI TARIXI

VA UNING KAPITALIZMDAN FARQI

Qulog'imizga "bozor iqtisodiyoti" atamasi tez-tez chalinadi. Ammo ko'pchilik bu tushuncha o'zi nima ekani va uning tarixi haqida yetarli bilimga ega emas. "Moliya kundaligi" ruknimiz orqali quyida shu xususida suhbatlashamiz.

Erkin bozor tizimi deganda odamlar ixtiyoriy ravishda bir-biri bilan savdo qiladigan, mahsulot va xizmatlarga talab hamda taklif tartibini yarata-digan iqtisodiyot tushuniladi. Bunda davlat aralashuvi va tartibga solishi juda kam yoki umuman bo'lmaydi. Bir so'z bilan aytganda, sof erkin bozorda jismoniy shaxslar va kompaniyalar iqtisodiy jihatdan o'zlarini xohlaganicha harakat qiladi.

Bozor iqtisodiyoti odamlar bir-biri bilan savdo qila boshlaganidan beri turli shakllarda mavjud bo'lib kelgan. Erkin bozorlar ijtimoiy muvofiqashtirishning tabiiy jarayoni sifatida paydo bo'lgan. Ya'ni ixtiyoriy ayirboshlash yoki xususiy mulk huquqini hech kim ixtiro qilmagan, hech bir hukumat buni konsepsiya qilib ishlab chiqmagan yoki puldan ayirboshlash vositasi sifatida foydalanishni birinchi amalga oshirmagan.

ERKIN BOZOR QACHON PAYDO BO'LGAN?

Bundan ko'p asrlar ilgari odamlar pulsiz ham bir-biri bilan savdo qilgan. Savdo dastlab norasmiy edi, ammo iqtisodiy ishtirokchilar oxir-oqibat valyuta ayirboshlash vositasi ushbu foydali operatsiyalarni osonlashtirishga yordam berishini tushunishdi.

Eng qadimgi ayirboshlash qishloq xo'jaligida ro'y bergan. Masalan, ayrim tahlilchilar don va qoramoldagi ayirboshlash miloddan avvalgi 9000-6000 yillarda vujudga kelganini taxmin qiladi. Bu miloddan avvalgi 1000 yillargacha amalda bo'lgan. Keyin Xitoy va Mesopotamiyada metall tangalar zarb qilindi va bu pul vazifasini bajaradigan tovarning birinchi ma'lum namunasi hisoblanadi.

IKKI USTUN

Bozor iqtisodiyotining ikki ustuni bor: ixtiyoriy ayirboshlash va xususiy mulk. Savdo bularsiz sodir bo'lishi mumkin, ammo bu bozor iqtisodiyoti bo'lmaydi. Ya'ni faqat bittasi bilan amalga oshirilsa, markazlashtirilgan tarzda bo'ladi.



Xususiy mulk tushunchasi tarixiy manbalar yozilishidan ancha oldin mavjud bo'lgan, lekin bunga oid muhim dalillar XVII-XVIII asrlar, aniqrog'i, Jon Lokkdan keyin paydo bo'ldi.

Jon Lokk - ingliz pedagogi va faylasufi, empirizm va liberalizm vakili. Uning g'oyalari gnoseologiya va siyosiy falsafaning rivojlanishiga katta ta'sir ko'rsatdi. U ma'rifat-parvarlik davrining eng nufuzli mutafakkirlari va liberal nazariyotchilaridan biri sifatida tan olingan.

ERKIN BOZORLAR KAPITALIZMDAN FARQLANADI

Erkin bozorlarni kapitalizmdan farqlash muhim.

Kapitalizm - tovarlar qanday ishlab chiqarilishining iqtisodiy tizimi. Bu yerda biznes egalari va investorlar (kapitalistlar) kompaniya, korporatsiya yoki zavod kabi markazlashtirilgan tashkilotda ishlab chiqarishni tashkil qiladi. Umuman, kapitalistlar barcha ishlab chiqarish vositalariga egalik qiladi. Ya'ni ko'chmas mulk, xomashyo, tayyor mahsulotlar va foyda. Shuningdek, kapitalistlar ish haqi evaziga ishchilarni yollaydi. Ishchilar mehnat asboblari, xomashyo, tayyor mahsulot yoki foydaning hech biriga egalik qilmaydi - ular faqat ish haqi uchun xizmat qiladi.

Erkin bozor esa iqtisodiy taqsimot tizimidir. U iqtisodiyotda kim nima va qancha olishini talab va taklif qonunlari orqali belgilaydi.

BOZOR KUCHLARIGA TARIXIY QARSHILIK

Erkin bozor amaliyotidagi ko'plab tarixiy yutuqlar mavjud elita tomonidan biroz qarshilik bilan kutib olingan. Masalan, bozorning ixtisoslashuvi va mehnat taqsimotiga bo'lgan tendensiyasi feodal Yevropada zodagonlar orasidagi kasta tizimiga zid edi.

Ommaviy ishlab chiqarish va zavod ishlariga ham siyosiy aloqador gildiyalar e'tiroz bildirdi. Texnologik o'zgarishlar 1811-1817-yillar oralig'ida ludditlarning hujumiga uchragan. Xususan, nemis iqtisodchisi Karl Marks ishlab chiqarish vositalariga bo'lgan barcha xususiy mulkni davlat tortib olishi kerak deb hisoblagan.

Nurillo TO'XTASINOV,
Bank-moliya akademiyasi
MBA magistranti

ERKIN BOZORNI HECH
KIM IXTIRO QILMAGAN,
U SAVDO VA SAVDO
UCHUN IJTIMOIY INSTITUT
SIFATIDA ORGANIK
RAVISHDA PAYDO BO'LDI.

Tarixda markaziy hokimiyat va davlat aralashuvi bozor iqtisodiyotining asosiy raqibi bo'lib kelgan. Zamonaviy tilda bu ko'pincha sotsializmga qarshi kapitalizm sifatida taqdim etiladi. Bu so'zlarning umumiy talqini va ularning haqiqiy ma'nolari o'rtasida texnik farqlarni ajratish mumkin bo'lsa-da, ular azaliy mojaroning zamonaviy ko'rinishlarini ifodalaydi, ya'ni davlat nazoratiga qarshi ixtiyoriy bozorlar.

Erkin savdo tarafdorlari hukumat aralashuvi va tartibga solishdan norozi bo'lishsa-da, xususiy mulk huquqlari, cheklangan javobgarlik va bankrotlik to'g'risidagi qonunlar kabi ba'zi huquqiy asoslar global erkin bozorlarni rag'batlantirishga yordam berdi.

Deyarli barcha zamonaviy iqtisodchilar bozor iqtisodiyoti hukumat araluviga qaraganda samaraliroq ishlaydi, degan fikrga qo'shiladi. Shunga qaramay, iqtisodiy ishlarda erkinlik va hukumat nazorati o'rtasidagi to'g'ri muvozanat haqida hali ham jiddiy muozaralar davom etmoqda.

BILASIZMI ?

KREDITLAR QANDAY TARTIBDA AJRATILADI?

Prezidentimizning 2021-yil 20-dekabrda "Oilaviy tadbirkorlikni rivojlantirish va aholining daromad man-bayini kengaytirishga doir qo'shimcha chora-tadbirlar to'g'risida"gi qaroriga muvofiq, imtiyozli kreditlar yillik 14 foiz stavkada oilaviy tadbirkorlik, daromad topishga qaratilgan muayyan mehnat faoliyati bilan shug'ullanish va faoliyat turini kengaytirish istagini bildirgan aholi hamda tadbirkorlik subyektlariga 3 oydan 6 oygacha bo'lgan imtiyozli davr bilan 3 yilgacha muddatga yagona elektron platforma (www.oilakredit.uz) orqali belgilangan tartibda ajratiladi. Jumladan, kreditlar har bir mahallaga birlashtirilgan hokim yordamchisining tavsiyalari asosida:

- tadbirkorlik tashabbusiga ega jismoniy shaxslarga 33 mln. so'mgacha bo'lgan miqdorda garov ta'minotisiz;
- belgilangan tartibda davlat ro'yxatidan o'tgan kichik tadbirkorlik subyektlariga 225 million so'mgacha bo'lgan miqdorda (uchinchi shaxs kafilligi, sug'urta polisleri, kredit hisobiga sotib olinayotgan mo'l-mulklar garovi, Jamg'armaning kafilligi va qonun hujjatlari doirasidagi boshqa ta'minot turlari asosida) beriladi.



BOYCHECHAK

Ziyoda
RAHIMBOYEVA

YO'QLAMA NEGA KERAK?

Dars boshlanib, talabalar ustozni "jon qulog'i" bilan tinglayotgan bir vaqtda eshik qiya ochiladi-yu, fikrlar, e'tibor va diqqat qoq o'rtasidan bo'linib, yo'qlamachi qizga o'g'irilamiz. Ko'pchilikning yuzida norozilik, kimgadir umuman farqi yo'q. Qanday ham farqi bo'lsin, axir, maktab davridanoq bunga ko'nikib qolganmiz.

Qani-iy, bugun qaysi darslar bor. Iya, fanlarning "dodalar" bor ekan-ku. Ha mayli. Ustozlar bilan bir otamlashar ekanmizda. Ana, o'zlari keldi.

- Hurma-a-a-t...

- Assalomu-u-u a-a-alaykum...

Hozir ustozga "paxta qo'yishning" ayni vaqti, ulgurib qol, Boychechak:

- Ustoz bugungi mavzumiz nima? Doskaga yozib qo'yaman (aniqrog'i, nimani g'iybat qilamiz???)

- Bugun mavzumiz... bugu-u-u-n... Kelinglar, mavzuga o'tishdan oldin o'zbek to'ylari haqida qisqacha gaplashsak. To'ylarda isrofgarchilik judayam ko'payib ketgan. Dasturxoniga yuz xil noz-u ne'matdan qo'ygandan ko'ra, shuni yetim-yesirlarga sadaqa qilsak bo'ladi-ku, to'g'rimi, talabalar?

Ob-bo-o-o, boshlandi. Bugun ham mavzuni o'tmas ekanmiz-da...

- Masalan, men yaqinda kichik qizimning to'yini qildim. Ortiqcha chiqim bo'lmasin deb qudam bilan to'ydan oldin kelishib oldim. Sarpisiga 2 dona ko'yлак va u bilan taqishga taqinchoq oldik, xolos. Kerak narsani to'ydan keyin ham olsa bo'ladi-ku, to'g'rimi, talabalar???

To'g'ri-i, to'g'ri. Siz aytasiz-u noto'g'ri bo'ladi? Xato desak, naqd imtihondan yiqitasisiz-ku!

- Ikki yosh yig'ilgan pullarni boshqa kerakli narsalarga ishlatishi mumkin. Masalan, qizim va kuyovim Anta-a-a-aliyaga bordi. Maz-za qilib dam olib keldi. Rasmlari ham bor, ko'rsataymi, talabalar?

Mayli, ko'raylik. Ko'rmaganimizga qo'yimsiz-ku!

- Sizlar ham kelajakda oila qurasizlar. O'rnak bo'lsin deymen-da. Voy, dars tugashiga ham 10 daqiqa qolibdi. Mavzuni telegram guruhi-gizga tashlab qo'yaman, kelasi dars seminarga tayyorlanib kelinglar. Men ketdim, 10 daqiqa oldin chiqishingiz mumkin. Menday mehribon ustoz yo'q, to'g'rimi, talabalar???

Ha-a-a, bo'lmasa-chi?! Sizga gap yo'q. Yaxshi boring. Qaytib kelmasangiz ham mayli. Hozir sizga o'xshagan bittasi keladi.

- Turilsi-i-i-n...

- Assalomu-u-u a-a-alaykum...

- Vaalaykum assalom, talabalarim. Kayfiyatlar qalay? Kuningiz yaxshi o'tyaptimi? Iltimos, mening darsimga universitetda o'qiydigan odamday kelinglar. Soqollarni olib, kiyimlarni dazmollab, paypoqning yangisini kiyib, atirlarni sepib, xo'pmi?

Xo'p bo'ladi-yey, ustozjon. Yomon toza odamsiz-da...

- Parmonjon, sen nega kepka kiyib olgansan, yech, bolam.

- Ustoz, kecha ishdan kech qaytgandim. To'g'risini aytaman yuvinishga ulgurmadim. Yechmay...

- Yo'q, yechasan. Menga gap qaytarma. Kepkada o'tirsang, darsimga xalal berasan. Yechasan yoki men bilan dekanatga borasan. Tush oldimga...

Eh, mana 2-para ham o'tdi hisob. Endi ular dars tugamaguncha qaytib kelmaydi. Yana bitta dars. O'zimga sabr tilayman.

- Vaalaykum assalom.

- Assalomu-u-u a-a-alaykum, ustoz. Uzi, ko'rmay qolibmiz.

- Menga kelganda hech kim hech narsani ko'rmay qoladi o'zi. Ovozlarining chiqqasini.

Jimlik... 5 daqiqa o'tdi, jimlik...

- Ustoz, bugungi mavzu nima?

- 5 minut jim o'tirasalarni, yo'qmi? Kayfiyatim yo'q. Boshim og'riyapti. Indamay o'z ishlaringni qilib o'tiringlar.

Boychechak, hozir ayni vaqti. Olg'a:

- T-sh-sh, ustozimning kayfiyati yo'q. Ustoz, tinchlikmi? Nega kayfiyatigiz yo'q? ko'rinishingiz ham yaxshi emas, bugun dars o'tmay qo'yavering. O'zimiz o'qib olamiz. Ketaveraylik.

- Mayli, boringlar, "moodle"ga ma'ruzani joylab qo'yaman. Yo'lda birov to'xtatsa, boshqa kursda o'qiyman deb yuboringlar.

Ana-a-a, hash-pash deguncha darsni ham tugatib oldik. Hech narsa o'rganmaganimizni hisobga olmasa, yaxshi kun bo'ldi. Ustozlarni ham tushunish kerak, ular ham odam. Dardini kimgadir aytgisi keladi, kayfiyati har xil bo'ladi.

Ertaga nima darslar bor edi? Nimalarni gaplashamiz ekan? Dastur molimni olvolaman, juda dardli "mavzu" bo'lsa, yig'lashimga to'g'ri kelib qolar...

Maktablarni-ku qo'ya turaylik, ammo oliy ta'lim muassasalarida yo'qlamaning nima keragi bor? Talaba bir necha yil davomida repetitor va o'zining mashaqqatli mehnati sabab talabalik maqomiga erishgan, shunday ekan, dargohga sababsiz kelmasligi, darslarda ishtirok etmasligi mumkinmi? Talabalar maskanga kelyaptimi, yo'qmi deb yo'qlama qilishda mantiq bormi? Agar siz "bor" deb javob bersangiz - haqsiz, "yo'q" deb javob bersangiz ham.

Bakalavr bosqichida tahsil oluvchi talabalarning aksariyat qismini 18-23 yoshdagi yigit-qizlar tashkil etadi. Bilasizki, bu yoshda ularda ilm olish bilan birga, turli chalg'ituvchi, foydasiz, hatto, zarar keltirishi mumkin bo'lgan narsalarga ham qiziqish bo'ladi. Birinchi qiziqishdan ikkinchisi ustun kelib qolmasligi uchun ham nazorat qilish va to'g'ri yo'nalish berib turish muhim. Ayniqsa, gap ularni turli yot g'oyalari va buzg'unchi kuchlardan himoya qilish haqida ketsa!

Agar muntazam davomat qilishning keragi yo'q, talaba qaysi darsga kirish kerakligini o'zi hal qilsin deydingan bo'lsangiz ham fikringizni xato deya olmaymiz. Masalan, bir necha yil avval O'zbekistondagi ko'pchilik OTMlarning yangicha, xorijiy tajribaga asoslangan tizim - "kredit modul"ga o'tkazilgani haqidagi xabarlar bilan birga, buning bir qator imkoniyatlari bo'yicha ma'lumotlar ham taqdim etilgan edi.

Misol uchun, talaba darslarda qatnashishga maqbul vaqtni va qaysi ustozdan ta'lim olishini o'z imkoniyatlaridan kelib chiqib tanlay oladi. Fanlar masalasi ham shunday: o'z qiziqishi hamda o'zlashtira olish ko'rsatkichiga qarab, yil davomida qaysi fanni o'rganmoqchi ekanini aniqlab ololadi.

Bu tizimning asosiy, shu bilan birga, talabalar uchun eng jozibali tomoni - talaba darslarda doimiy ishtirok etishga majburlanmaydi. Agar u qoldirilgan darsni mustaqil o'zlashtirib olishiga ko'zi yetsa, darsdan boshqa mashg'ulotlar bilan band bo'lishi, ish joyida, kutubxonada yoki shunchaki, do'stlari davrasida vaqt o'tkazishi mumkin. Muhimi, u oraliq nazorat imtihonlarini a'lo bahoga topshira olishi kerak. Davomat masalasi, u to'plagan kreditlar soniga jiddiy ta'sir ko'rsatmaydi. Har holda Yevropada shunday tartib o'rnatilgan.

Ammo bizda... 2021-yil tashkil etilgan Yangi O'zbekiston universitetidan boshqa oliy o'quv yurtlarida oldingi tizimning ayrim tartib-qoidalari, shu bilan birga, davomat masalasi ham hozircha ma'lum darajada saqlanib qolmoqda, va talabalardagi norozilik kayfiyati ham.

Aynan shunday yo'qlamachi qizning aytishicha, ko'pchilik talabalarni shu savol qiyin va norozi bo'lishiga sabab bo'lar ekan: kontraktini to'lagandan keyin kelish yoki kelmaslik talabani o'ziga havola etilishi kerak emasmi?

Xo'sh, siz qanday fikrdasiz?





DAHSHAT ICHIDA

Hikoya

..U musibat xonasi o'rtasidagi stol ustidan boshini ko'targanida atrofidagi g'alati manzaraga ko'zi tushdi. Ko'zlarini pipiratib, atrofidagi devor bo'ylab o'rnatilgan tokchalarga tikilib qaray boshladi. Ularning har birida alohida-alohida olov alanganayotgandi..

Keyin bir ovoz keldi – ayolning faryodi! Mana bu burchakdan! Shu tomondan yonayotgan olovlarining birida xotinini kaltaklayotgan mast erkak tasviri gavdalandi. Taajjubga tushgan kimsa o'sha tomonga yaqin bordi. Keyin qarama-qarshi tomondan bir go'dakning chinqirigi eshitildi. Bu safar olov sirtida burchakka tiqilib, devorga suyangancha yig'layotgan bola ko'rindi! Tormozning chiyillashi! Mast holda rulda o'tirgan erkakning yuzi qonga belangandi! Tokchalardagi har bir olovda birdaniga qandaydir suratlar paydo bo'lgan edi.

Ichkilikbozlar davrasidagi zaharxandalar, qadahlarning bir-biriga urilgan. Ko'ziga ko'rinayotgan bu g'alati holat uni tamoman karaxt holatga solib qo'ygandi. Muzlab ketgan tanasi negadir qiziy boshladi – shimining balog'i yonib boshlagan ekan! Jon holatda tashqariga otilmoqchi bo'ldi-yu, ammo shu payt temir eshik zanjirband qilingandek o'z-o'zidan taraqlab yopildi. Harchand urinib eshikni ocholmagach, ortga tisarildi va yonayotgan oyog'ini changallab, yerga gursillab yiqildi. Shu dam tokchalardagi olovlar pastga oqib, har tarafdan u tomon kela boshladi – kimsa dahshat ichida qolganini his qiladi shunda! Ana shu payt allaqayerdan do'nilagan ovoz ham yangradic – shu yerda abadiy mahkumsan, ey gunohkor banda!

“
KEYIN BIR OVOZ KELDI –
AYOLNING FARYODI! MANA BU
BURCHAKDAN! SHU TOMONDA
YONAYOTGAN OLOVLARNING
BIRIDA XOTININI
KALTAKLAYOTGAN MAST
ERKAK TASVIRI
GAVDALANDI.

..U stoldan boshini ko'tarib, o'rnidan turganida yuragi dukduk urayotgandi. Ko'rgani tush ekan, xayriyat! Qo'rqa-pisa atrofqa qaradi. Tippa-tinch! Hech narsa ko'rinmadi! Rastalarda terib qo'yilgan bir-biridan bejirim qadoqdagi aroqlar bor, xolos – ular chor-atrofini egallagandi.

Telefoni jiringladi. Xo'jayin ekan.
– Savdo qanday bo'lyapti? – Tushida yangragan do'nilagan ovoz uni hushyor torttirdi.

– Hammasi joyida, – sotuvchi yigit bir yutunib so'z qotdi.

– Endi gap bunday, bugundan boshlab kechalari ham savdo qilasan. Senga shu yerning o'zidan bir xona tayyorlab beraman. Do'kon ishi to'xtamasligi kerak. Qancha ko'p ishlasang, maoshing ham shuncha ko'p bo'ladi.

– Xo'p..

Shu yerda "abadiy" qolish taklifi yigitning vujudidagi vahimani bat-tar kuchaytirib yubordi. Xuddi tushida ko'rganlari takrorlanayotgan edi go'yo! U telefonini cho'ntagiga solarkan, atrofqa sekingina qarab, boyagina ko'z o'ngida gavdalangan tasvirlarni xayoliga keltirdi. Qulog'iga ham allanima tovushlar eshitilgandek bo'ldi. Shu onda temir eshik yopilib qolishidan qo'raqqan aroqfurush yugurib o'sha tomonga bordi va chiroqni o'chirish ham esidan chiqib, do'konni qaltiroq bosgan qo'llari bilan qullfadi hamda aniq bir manzilga borishni bilolmay nari ketdi..

Ozod MUSTAFOYEV,

O'zbekiston Jurnalistlar uyushmasi Navoiy viloyati bo'limi xodimi

ISHONCH TELEFONI ISHGA TUSHDI

Mamlakatimiz fuqarolari va yurtimiz mehmonlari biror bir madaniy meros yodgorligi yoki obidaga nisbatan noqonuniy xatti-harakatlar yoki ularga bo'layotgan xavfni sezganda, **+ (71) 200 0118** telefon raqamiga murojaat qilishlari mumkin bo'ladi.

O'ZING QAHRAMONSAN, O'ZING BAHODIR...

XOTIRA

(Otamning deyoymaganlari..)



Rashid XO'JAMOV

Toshkent davlat o'zbek tili va adabiyoti universiteti magistri

Ta'bir bering tushimga.. Ta'bir bering tushimga – Netsam ta'qib etmaydi? Ko'zlarimdan bolamning Kulgilari ketmaydi. Meni hamma kutar-u Bitta o'lim kutmaydi? "Osmon to'la havolar – faqat menga yetmaydi", faqat menga yetmaydi.

Qibla tomon qayerda, Yuzim burib qo'y, bolam! Balki, ketgum sayrga Yuz-ko'zimga to'y, bolam. Faryod solma, kar dunyo – Eshitmaydi, qo'y, bolam. O'rtansam ham qabrimda O'rtaydi bir o'y, bolam. Mushtoqlikning yarasi Mahshargacha bitmaydi.

Kelib-kelib turaman, Ko'ngling bo'lsin xotirjam. Ranjimayman boshimga Har kun borolmasang ham. Bu oxirgi siylovmas – Bardam bo'linglar, bardam. So'nggi bora suv tutqaz, Sen bersang, obi zam-zam. Endi sensiz suvga ham Mening tishim o'tmaydi.

Zuvalam azaldan xom, Ammo qismat rasida. Hozir qishmi yo bahor Deraza orqasida? Kuz bo'lsa ham mayliga – Havo bersa, bas edi. Axir, men ham bitgandim Xazonlarga qasida.. Tinch qo'yib qo'ymas bu darad, Tinchitib ham qo'ymaydi.

Shamoldan uchqur edim – Bir sabochocha shashtim yo'q. Shamolmidi yo bo'ron Yuragimga soldi suq. Dunyo sadqa pallamda Bo'layapman tasadduq. Baqalar yerdan turib Yulduzlarga urar do'q.. Yulduzlarga urar do'q – Madorim manglaydagi Chivinga ham yetmaydi.

Oh, charchatdi hayotning Bergan o'lik umidi. Men-ku, mayli, sochimning Oqargani shumidi? Tirlikda ming bora O'ldirgani kammidi? So'roqlansam, So'rorsam, Darvoqe, men kim edim? Dard degani birgina O'lish bilan bitmaydi!

So'roqlansam, So'rorsam, Darvoqe, men kim edim?



Sardor SA'DULLAYEV

BURCH

Vatan, de onadan tug'ilganingdan, Gavdang mayda bo'lsa olma xavotir. O'zgalardan kutma mardlik qilishni, O'zing qahramonsan, o'zing bahodir.

Obro'yingdan ko'proq o'yla yurtiingni, Muqaddas nomiga yuqtirmasdan gard. Jussang kichikligi ahamiyatsiz vaj, Yuraging kichkina bo'lmasligi shart..

TALABA-YOSHLAR UCHUN

Innovatsion rivojlanish vazirligi 2022-yilning 10-maydan 10 iyuniga qadar faol talaba-yoshlar o'rtasida "Wikipedia" portalining o'zbek tilidagi segmentiga yangi ma'lumotlar va maqolalarni joylashtirish hamda ularni ommalashtirish bo'yicha tanlov o'tkazmoqda.

Tanlov internet tarmog'ida o'zbek tilidagi ma'lumotlar hajmi va ko'lamini kengaytirish hamda Global innovatsion indeksda respublikamiz o'rnini mustahkamlash, shuningdek, yosh avlodning ijtimoiy faolligi, internet savodxonligi va izlanuvchanligini rag'batlantirishga qaratilgan.

Tanlov yakunlariga ko'ra eng ko'p maqola joylashtirgan 10 nafar talaba-yoshlar va talabalari eng ko'p maqola joylashtirgan 3 ta oliy ta'lim muassasasi munosib taqdirlanadi.

Ishtirokchilar tanlovda qatnashishdan avval qisqa onlayn anketani to'ldirishi lozim.

Tanlov tartibi va shartlari bilan mininovation.uz sayti orqali tanishishingiz mumkin.

Factor books



Dominant

Kitobxonlar uchun mutolaadan keyin qizg'in muhokama, yutuqli o'yin va viktorinalar

ikar

Ilk katta adabiy rezonans! Zabardast o'zbek mualliflaridan sara asarlar, mutolaa uchun ikki bosqichli mega-tanlov

factor focus

Zamonaviy kasblar va bilimlar haqidagi eng mashhur ilmiy-ommabop adabiyotlardan turkum tarjimalar

factor_books

factor_books

factor_books

95 035 95 11

YOSHLAR OVOZI

Bosh muharrir:
Hamza ABDULLAYEV

Muassis:
O'zbekiston yoshlar ittifoqi
Markaziy Kengashi

Bosh hamkor:
O'zbekiston Respublikasi
Yoshlar ishlari agentligi

Navbatchi muharrir:
Muhammadshukur Muhammadjonov

Musahhihlar:
Rashid XO'JAMOV,
Qirmizoy HAKIMOVA

Gazeta O'zbekiston Respublikasi Prezidenti Administratsiyasi huzuridagi Axborot va ommaviy kommunikatsiyalar agentligida 2020-yil 11-dekabrda № 0242 raqami bilan qayta ro'yxatdan o'tgan. Gazeta materiallari tahririyat kompyuter markazida teriladi va sahifalandi. Tahririyat manzili: 104033, Toshkent, Matbuotchilar ko'chasi, 32. Telefonlar: (7) 233-22-16, (7) 236-79-95.

"Shara" nashriyot-matbaa aksiyadorlik kompaniyasi boshqaruvida, A-3 formataida chop etiladi. Hajmi - 2 bosma taboa. Korxonada manzili: Buyuk Turon ko'chasi, 41. Indekslar: 203, 3203. Bahosi kelishilgan narxda. Buyurtma G-555, Adadi - 10586. Bosishga topshirilgan vaqti - 21.00. Topshirildi - 20.00.

Saytimizga o'tish uchun QR-kodni telefoningiz orqali skaner qiling.

